

S T A T U T

**LJEKARSKE/LIJEČNIČKE KOMORE
FEDERACIJE BOSNE I HERCEGOVINE**

Zenica, april/travanj 2012. godine

Na osnovu člana 223. stav 1. Zakona o zdravstvenoj zaštiti (“Službene novine Federacije BiH”, broj 46/10 i 75/13) Ljekarska/Liječnička komora Federacije Bosne i Hercegovine na Skupštini održanoj dana 14.04.2012. godine donijela je, a dana 22. aprila 2017. godine i dana 27.04.2019. godine usvojila je izmjene i dopune Statuta, zatim je dana 10.10.2020. godine Izborna Skupština Ljekarske/Liječničke komore FBiH donijela izmjene Statuta te je dana 16.10.2021. godine Skupština Ljekarske/Liječničke komore F BiH usvojila izmjene i dopune Statuta čiji prečišćeni tekst glasi

S T A T U T

LJEKARSKE/LIJEČNIČKE KOMORE FEDERACIJE BOSNE I HERCEGOVINE

I OPŠTE ODREDBE

Član 1.

Ljekarska/Liječnička komora Federacije Bosne i Hercegovine (u daljem tekstu: Komora) je strukovno udruženje doktora medicine, članova kantonalnih/županijskih ljekarskih/liječničkih komora koje djeluju na području Federacije Bosne i Hercegovine (u daljem tekstu: Članice), koji su, radi očuvanja i zaštite interesa svoje profesije, zadovoljavanja stručnih i ličnih interesa, osiguravanja uslova za organizovan nastup zdravstvenih radnika istih profesionalnih grupa, kao i zaštite zdravlja građana, Odlukom o osnivanju donesenoj na osnivačkoj Skupštini u Zenici dana 14.01.2012. godine osnovali ovu Komoru.

Član 2.

Ovim Statutom utvrđuje se:

- osnivanje, djelokrug i organizacija rada
- naziv i sjedište,
- ciljevi i djelatnosti,
- zastupanje i predstavljanje,
- nadležnosti Federalne komore, te način njenog finansiranja,
- organi, njihove nadležnosti, način imenovanja i opoziva, trajanje mandata, kvorum i pravila glasanja, sukob interesa,
- oblik i sadržaj pečata,
- oblik i sadržaj znaka,
- sadržaj, rokovi i način stručnog usavršavanja članova kantonalnih komora u skladu sa zajedničkim sadržajem stručnog usavršavanja utvrđenog od ove Komore,
- postupak izdavanja, obnavljanja i oduzimanja licence, dobnu granicu do koje se licenca obnavlja, uvjete pod kojima se razmatra obnavljanje odobrenja, te obavezu podnošenja izvještaja nadležnom ministru zdravstva ukoliko kandidat ne udovolji uvjetima za obnavljanje dozvole, kao i pravila postupanja u vezi sa navedenim u skladu sa zajedničkim kriterijima licenciranja utvrđenim od ove Komore,
- način vođenja registra licenciranih članova kantonalnih komora u skladu sa aktom ove Komore kojim se utvrđuje sadržaj i izgled registra,
- granice, način i druga pitanja vezana uz ostvarenje javnih ovlaštenja iz člana 221. Zakona,
- razrada načina obavljanja ostalih poslova utvrđenih čl. 221. i 222. Zakona.

- uvjeti i način učlanjenja, prestanak članstva, prava i odgovornosti članova,
- imovina,
- javnost rada,
- saradnja sa drugim udruženjima, organizacijama i ustanovama,
- raspodjela imovine u slučaju prestanka rada.

II NAZIV I SJEDIŠTE

Član 3.

Naziv komore glasi: **Ljekarska/Liječnička komora Federacije Bosne i Hercegovine**. Skraćeni naziv glasi: **LJKFBiH**.

Za komunikaciju u međunarodnom pravnom saobraćaju Komora koristi naziv na engleskom jeziku koji glasi: **Medical Chamber of Federation of Bosnia and Herzegovina**.

Član 4.

Sjedište Komore nalazi se u gradu u kojem radi predsjednik Ljekarske/Liječničke komore Federacije BiH koji je u trenutnom mandatu.

U sadašnjem mandatu sjedište LJ/LK Federacije BiH je u Tuzli, ulica Turalibegova br. 20.

Član 5.

Komora djeluje na području Federacije Bosne i Hercegovine.

Član 6.

Komora ima status pravnog lica i upisuje se u registar nadležnog Suda.

Komora u pravnom prometu sa trećim licima istupa samostalno i neograničeno u svoje ime i za svoj račun.

U pravnom prometu sa trećim licima Komora za svoje obaveze odgovara svim svojim sredstvima.

Za obaveze Federalne Komore ne odgovaraju Članice, k/ž Komore.

III CILJEVI

Član 7.

Ciljevi osnivanja i djelovanja Komore su:

- jedinstveno nastupanje prema nadležnim federalnim organima i institucijama iz oblasti zdravstva i zdravstvene zaštite, kao i evropskim i svjetskim zdravstvenim organizacijama te uspostavljanje trajnog dijaloga i poboljšanja sistema zdravstvene zaštite i djelovanja ljekarskih/liječničkih komora u Federaciji Bosne i Hercegovine i usklađivanje sa evropskim standardima djelovanja;
- uvođenje jedinstvenih i jednoobraznih standarda djelovanja te primjena najboljih praksi na temeljima najviših etičkih, profesionalnih i tehničkih standarda ljekarske/liječničke struke radi zaštite i unapređenja interesa ljekara; kao i stvaranje uslova za organizovanje ljekarske/liječničke komore na nivou Bosne i Hercegovine i pristupanje evropskim i svjetskim zdravstvenim organizacijama.

IV NADLEŽNOSTI KOMORE

Član 8.

- utvrđuje zajedničke kriterije za licenciranje članova kantonalnih/županijskih komora;
- utvrđuje sadržaj i izgled Registra licenciranih članova komore za federalnu i kantonalnu/županijsku komoru;
- koordinira rad postojećih kantonalnih/županijskih komora, usklađuje i unificira postojeće akte kantonalnih/županijskih komora u cilju lakše komunikacije između istih, a u cilju dobrobiti za sve ljekare/lječnike Federacije BiH;
- učestvuje u rješavanju i arbitriranju eventualnih problema između postojećih kantonalnih/županijskih komora;
- vodi jedinstven register licenciranih članova kantonalnih/županijskih komora;
- utvrđuje zajednički sadržaj stručnog usavršavanja, rokove i postupak provjere stručnosti koje je ljekar ostvario u toku stručnog usavršavanja;
- utvrđuje način i uslove za upravljanje novom zdravstvenom tehnologijom;
- obavlja i druge poslove i zadatke, koji joj budu dati ovim Statutom Komore

Član 9.

Pored nadležnosti iz člana 8. ovog Statuta Komora u ostvarivanju svojih ciljeva, obavlja slijedeće djelatnosti:

- daje stručno mišljenje na propise od uticaja na razvoj zdravstvene struke;
- prati razvoj Kodeksa medicinske etike i deontologije, dok kantonalne/županijske komore prate i nadziru njegovo provođenje te preduzimaju odgovarajuće mјere u slučaju njihovog kršenja;
- daju mišljenje federalnom ministru zdravljia (odnosno kantonalnom ministru kod kant./žup. komora) o opravdanosti izdavanja, (kod k/ž komora produženja ili oduzimanja odobrenja za obavljanje poslova privatne prakse,) te početka, proširenja, promjene i prestanka rada zdravstvenih ustanova na nivou Federacije sa pozicije i očuvanja profesije koju zastupa;
- sarađuje sa Federalnim ministarstvom zdravstva i drugim organizacijama iz oblasti zdravstva, inspekcijskim, zavodima zdravstvenog osiguranja na nivou Federacije, udruženjima zdravstvenih radnika, kao i komorama iz oblasti zdravstva Republike Srpske i Distrikta Brčko, te sličnim asocijacijama u zemlji i inostranstvu;
- utvrđuje uslove i način reklamiranja zdravstvenih usluga na nivou Federacije BiH;
- koordinira i usaglašava stavove kantonalih komora, te obavlja i druge poslove koji su od interesa za njene članove;
- obavlja i druge djelatnosti koje su neposredno u funkciji ostvarivanja statutarnih ciljeva Komore u skladu sa Zakonom i ovim Statutom.

V ZASTUPANJE I PREDSTAVLJANJE

Član 10.

Komora ima jednog predsjednika i dva podpredsjednika koji su iz različitih Članica. Komoru predstavlja i zastupa predsjednik Komore, a u njegovom odsustvu i po ovlaštenju predsjednika Komore, zamjenici predsjednika Komore.

Predsjednik Komore može dati pismenu punomoć drugoj stručnoj osobi za zastupanje Komore u pojedinim poslovima ili postupcima, pri čemu je dužan odrediti sadržaj, obim i trajanje ovlaštenja za zastupanje.

VI ORGANI KOMORE

Član 11.

Organji Komore su:

- Skupština
- Izvršni odbor
- Nadzorni odbor
- Predsjednik i zamjenici predsjednika Komore
- Predsjednik i zamjenik predsjednika Skupštine Komore
- Komisija za registar
- Komisija za koordinaciju edukacije
- Komisija za međunarodnu saradnju
- Komisija za kodeks medicinske etike i deontologije
- Komisija za privatnu praksu
- Komisija za lijekove
- Komisija za postupak verifikacije i certifikacije zdravstvenih ustanova i zdravstvenih radnika
- Sud LJ/LKFBiH
- Tužilac Komore

Skupština

Član 12.

Skupština je najviši organ Komore.

Skupštinu čine delegati svake članice – kantonalne/županijske komore sa jednakim pravom na jedan glas, koje u slučaju njihove odsutnosti mijenjaju zamjenici.

Delegati se biraju na mandat od 4 godine sa neograničenim brojem mandata.

Ukoliko imenovanom delegatu, odnosno zamjeniku prestane članstvo u ljekarskoj/lječničkoj komori kantona/županije ispred koje je imenovan, ista je dužna delegirati drugog.

Broj delegata u Skupštini Federalne komore, za jedan mandatni period, zavisi od broja registrovanih aktivnih članova (aktivni članovi: članovi koji su u radnom odnosu, imaju važeću licencu i uredno izmiruju članarinu) svake kantonalne komore (članice) na dan 31.12. prethodne godine, koje predlažu delegate po principu:

- za članice koje broje do 500 članova: 2 delegata
- za članice koje broje od 501-750 članova: 3 delegata
- za članice koje broje od 751-1000 članova: 4 delegata
- za članice koje broje od 1001-1250 članova – 5 delegata
- za članice koje broje od 1251-1500 članova – 6 delegata
- za članice koje broje od 1501 – 1750 članova – 7 delegata
- za članice koje broje od 1751 – 2000 članova – 8 delegata
- za članice koje broje preko 2000 – 10 delegata

Član 13.

Skupština ima slijedeće nadležnosti:

- donosi Statut, te izmjene i dopune Statuta;
- donosi Poslovnik o radu Skupštine;
- donosi Pravilnik o izboru i opozivu organa Komore;
- donosi Pravilnik o finansijskom poslovanju Komore;
- donosi Poslovnik o radu Izvršnog odbora Komore;
- donosi Pravilnik o radu Nadzornog odbora;
- bira i razrješava i predsjednika i zamjenike predsjednika Komore;
- verificuje predsjednike i članove stalnih Komisija Komore koje predlaže Izvršni odbor;
- donosi odluke o sklapanju poslova čija vrijednost prelazi iznos 50.000,00 KM;
- daje saglasnost na pravne radnje poduzete u postupku osnivanja Komore;
- donosi Odluku o promjeni naziva i sjedišta Komore;
- verificuje članove Izvršnog odbora predložene od kantonalnih/županijskih komora;
- verificuje članove Nadzornog odbora predložene od kantonalnih/županijskih komora;
- bira i opoziva predsjednika i zamjenika predsjednika Skupštine;
- imenuje i razrješava lica ovlaštena za zastupanje i predstavljanje;
- razmatra i usvaja godišnji Program rada i Finansijski plan, na prijedlog Izvršnog odbora;
- razmatra i usvaja, najmanje jednom godišnje Izvještaj o radu i finansijskom poslovanju, kao i Izvještaj o radu Nadzornog odbora;
- daje smjernice za rad drugim organima Komore po svim pitanjima od značaja za rad organa radi uspješnog ostvarivanja statutarnih ciljeva i obavljanja utvrđene djelatnosti;
- odlučuje u drugom stepenu po prigovorima na odluke Izvršnog odbora;
- utvrđuje iznos i način plaćanja članarine na prijedlog Izvršnog odbora;
- odlučuje o udruživanju u saveze, pripajanju, razdvajaju, transformaciji, prestanku rada i drugim statusnim promjenama Komore;
- odlučuje o raspodjeli imovine Komore za slučaj njenog prestanka;
- odlučuje o svim drugim pitanjima koja nisu u nadležnosti drugog organa u skladu sa Zakonom i Statutom.

Član 14.

Skupština radi u sjednicama koje se održavaju prema potrebi, a najmanje jednom godišnje. Svake četvrte godine održava se sjednica Izborne Skupštine Komore.

Član 15.

Skupština može početi sa radom i donositi punovažne odluke ukoliko ima kvorum, odnosno, ukoliko sjednici prisustvuje natpolovična većina (50%+1) ukupnog broja delegata.

Ukoliko u zakazano vrijeme početka sjednice Skupštine nije postignut kvorum iz stava 1. ovog člana, sjednica sa istim dnevnim redom zakazuje se u roku od 15 dana, o čemu se pismeno izvještavaju.

Odluke o usvajanju, izmjeni i dopuni Statuta, izboru i razrješenju predsjednika Komore i iznosu godišnje članarine donose se dvotrećinskom (2/3) većinom prisutnih delegata Skupštine.

Član 16.

Predsjednika i zamjenika predsjednika Skupštine iz svog sastava bira i svojom odlukom imenuje Skupština na period od četiri godine, uz mogućnost ponovnog izbora istih osoba za najviše još jedan mandat.

Prijedlog za predsjednika i zamjenike Skupštine daju članovi Skupštine.

Skupština Komore bira predsjednika Skupštine dvotrećinskom (2/3) većinom prisustnih delegata.

Ukoliko u prvom krugu glasanja niko od kandidata ne dobije dovoljan broj glasova, izbor se ponavlja sa dva kandidata koji su dobili najveći broj glasova.

U drugom krugu izabran je onaj kandidat koji ima većinu glasova.

Zamjenika predsjednika Skupštine komore bira Skupština prostom većinom.

Delegati iz stava 1. ovog člana moraju biti predstavnici različitih članica.

Član 17.

Predsjednik Skupštine:

- saziva sjednice Skupštine,
- rukovodi radom Skupštine,
- sudjeluje u pripremi materijala za sjednicu Skupštine,
- stara se o provođenju odluka i zaključaka Skupštine,
- obavlja i druge poslove u skladu sa Zakonom, Statutom i drugim aktima Komore.

Predsjednika Skupštine u slučaju spriječenosti ili odsutnosti mijenja zamjenik predsjednika Skupštine, sa svim pravima i ovlaštenjima predsjednika Skupštine.

Član 18.

Predsjedniku Skupštine prestaje mandat:

- podnošenjem ostavke;
- istekom mandaata;
- prestankom članstva u kantonalnoj/županijskoj ljekarskoj/lječničkoj komori iz koje je delegiran;
- opozivom od strane kantonalne/županijske ljekarske/lječničke komore ispred koje je delegiran;
- ako tri puta neopravdano ne prisustvuje sjednici Skupštine opozivom od strane Skupštine,
- ako ne izvršava uredno i savjesno povjerene dužnosti i odgovornosti ili na drugi način ugrožava ugled i ciljeve Komore,
- u drugim slučajevima propisanim Zakonom i ovim Statutom.

Razrješenje predsjednika Skupštine, iz razloga navedenih u stavu 1. ovog člana, vrši Skupština.

Član 19.

Predsjednik Skupštine je dužan sazvati Skupštinu na obrazloženi pisani zahtjev:

- Izvršnog odbora,
- Nadzornog odbora ili
- 1/3 delegata Skupštine.

U slučaju da predsjednik Skupštine ne sazove Skupštinu u roku od 30 dana od dana prijema zahtjeva iz stava 1. ovog člana, ovlašteni za sazivanje Skupštine su potpredsjednik Skupštine, a ukoliko on to ne učini, najstariji delegat Skupštine.

Osoba ovlaštena za saziv Skupštine će utvrditi prijedlog dnevnog reda i predsjedavati radom Skupštine.

Član 20.

Predsjednik i zamjenik predsjednika Skupštine za svoj rad odgovaraju Skupštini.

Član 21.

Bliže odredbe o načinu rada, glasanju, odlučivanju, sazivanju sjednice, vođenju zapisnika i drugim pitanjima od značaja za rad Skupštine regulišu se Poslovnikom o radu Skupštine.

Izvršni odbor

Član 22.

Izvršni odbor je izvršni organ koji rukovodi radom i poslovanjem Komore u periodu između 2 Skupštine.

Član 23.

Izvršni odbor ima slijedeće nadležnosti:

- organizuje, rukovodi radom i poslovanjem Komore i obezbjeđuje vršenje svih poslova iz okvira djelatnosti Komore;
- učestvuje u pripremi sjednice Skupštine;
- priprema i predlaže nacrt izmjena i dopuna Statuta i drugih općih akata koje donosi Skupština;
- imenuje i razrješava predsjednike i članove stalnih i privremenih Komisija Komore;
- podnosi Skupštini izvještaj o svom radu;
- donosi akte o finansijskom poslovanju, kao i druge pravilnike potrebne za rad Komore te njihove izmjene i dopune;
- učestvuje u radu Skupštine bez prava odlučivanja;
- provodi politiku, zaključke i druge odluke Skupštine;
- upravlja imovinom Komore;
- vodi finansijsko poslovanje i upravlja sredstvima Komore s pravom da odlučuje o pravnim poslovima u vrijednosti do 50.000KM;
- organizuje izdavanje lista Komore i imenuje i glavnog i odgovornog urednika lista te članove uredničkog odbora;
- podnosi Skupštini godišnje i periodične izvještaje radu i poslovanju Komore;
- predlaže Skupštini iznos i način uplate članarine;
- stara se o redovnom i potpunom informisanju Članica i Članstva o radu Komore i njenih organa, kao i javnosti;
- odlučuje o saradnji sa drugim srodnim udruženjima i društvima, organizacijama i ustanovama u zemlji i inostranstvu;
- vrši i druge poslove u skladu sa Zakonima, Statutom i drugim aktima Komore.

Član 24.

Predsjednika i zamjenika predsjednika Izvršnog odbora biraju između sebe članovi Izvršnog odbora na prvoj konstituirajućoj sjednici Izvršnog odbora.

Izvršni odbor u cjelini i svaki član posebno za svoj rad odgovara Skupštini.

Predsjednik, a u njegovoj odsutnosti zamjenik predsjednika Izvršnog odbora:

- saziva i predsjedava sjednicama Izvršnog odbora,
- predlaže Dnevni red sjednica Izvršnog odbora u saradnji sa predsjednikom Komore,
- daje prijedloge Pravilnika i njihovih izmjena i dopuna, kao i prijedloge drugih akata za čije je donošenje nadležan Izvršni odbor,
- sprovodi odluke, zaključake i smjernica Izvršnog odbora, kao i one koje mu povjeri Skupština,
- potpisuje akte koje donosi Izvršni odbor,
- vrši druge poslove za koje je ovlašten Statutom i drugim aktima Komore i koje mu povjeri Skupština i Izvršni odbor;

Član 25.

Izvršni odbor čine po jedan predstavnik Članice Komore koja broji do 1000 članova i po dva predstavnika Članice Komore koja broji preko 1000 članova.

Mandat članova Izvršnog odbora traje četiri godine, uz mogućnost ponovnog izbora iste osobe za člana Izvršnog odbora za najviše još jedan mandat.

Svaka članica Komore je dužna da iz reda svog članstva delegira predstavnika/predstavnike za člana/članove Izvršnog odbora.

Skupština vrši imenovanje delegiranih predstavnika u Izvršni odbor.

Za člana Izvršnog odbora ne može biti delegiran predstavnik Skupštine niti član Nadzornog odbora.

Član 26.

Članu Izvršnog odbora mandat prestaje:

- istekom mandata, ako ne bude ponovo imenovan na istu funkciju,
- podnošenjem ostavke,
- prestankom članstva u kantonalnoj/županijskoj ljekarskoj/lječničkoj komori iz koja je delegiran,
- opozivom od strane kantonalne/županijske ljekarske/lječničke komore ispred koje je delegiran,
- ako tri puta neopravdano ne prisustvuje sjednici Izvršnog odbora,
- ako ne izvršava uredno, savjesno i zakonito povjerene dužnosti i odgovornosti ili na drugi način ugrožava ugled i ciljeve Komore,
- u drugim slučajevima propisanim Zakonom i ovom Statutom.

Razrješenje člana Izvršnog odbora iz razloga navedenih u stavu 1. ovog člana vrši Skupština.

Član 27.

U slučaju prijevremenog razrješenja člana Izvršnog odbora, Skupština, po prijedlogu komore čiji je član Izvršnog odbora prijevremeno razriješen, imenuje novog člana Izvršnog odbora, do isteka mandata Izvršnog odbora u čiji sastav je imenovan.

Član Izvršnog odbora koji podnese ostavku dužan je obavljati svoju dužnost do donošenja odluke o razrješenju.

Član 28.

Izvršni odbor radi i odlučuje na sjednicama koje se održavaju prema potrebi.

Izvršni odbor može početi sa radom i donositi punovažne odluke ukoliko ima kvorum, odnosno, ukoliko sjednici prisustvuje natpolovična većina (50%+1) ukupnog broja članova Izvršnog odbora.

Izvršni odbor odluke donosi većinom glasova prisutnog broja članova Izvršnog odbora.

Član 29.

Sjednice Izvršnog odbora saziva predsjednik Izvršnog odbora.

Predsjednik Izvršnog odbora je dužan sazvati sjednicu na obrazloženi zahtjev:

- 1/2 članova Izvršnog odbora,
- predsjednika Skupštine,
- predsjednika Komore,
- predsjednika Nadzornog odbora.

U slučaju da predsjednik Izvršnog odbora ne sazove sjednicu Izvršnog odbora u roku od 30 dana od dana prijema zahtjeva, podnosioci zahtjeva iz stava 2. ovog člana su ovlašteni sazvati sjednicu.

Član 30.

Bliže odredbe o načinu rada, glasanju, odlučivanju, sazivanju sjednice, vođenju zapisnika i drugim pitanjima od značaja za rad Izvršnog odbora regulišu se Poslovnikom o radu Izvršnog odbora.

Predsjednik i zamjenici predsjednika Komore

Član 31.

Predsjednik Komore:

- predstavlja i zastupa Komoru,
- potpisuje odluke i druge akte Komore;
- zaključuje poslove do vrijednosti 5.000,00 KM, a preko tog iznosa mora dobiti saglasnost Izvršnog odbora;
- učestvuje u radu Izvršnog odbora, daje prijedloge i sugestije, ali nema pravo odlučivanja u radu Izvršnog odbora,
- daje prijedloge pravilnika i njihovih izmjena i dopuna, kao i prijedloge drugih akata za čije je donošenje nadležan Izvršni odbor i Skupština komore,
- sprovodi odluke, zaključake i smjernica Izvršnog odbora, kao i one koje mu povjeri Skupština,
- vrši druge poslove za koje je ovlašten Statutom i drugim aktima komore i koje mu povjeri Skupština i Izvršni odbor;

Predsjednik Komore, uz saglasnost Izvršnog odbora aktima Komore, odlučuje o angažovanju:

- sekretara Komore,
- diplomiranog pravnika,
- drugih stručnih kadrova za potrebe rada organa Komore.

Status lica iz prethodnog stava regulisat će se posebnim odlukama, odnosno ugovorima.

Član 32.

Skupština Komore bira predsjednika Komore dvotrećinskom (2/3) većinom prisustnih delegata na period od četiri godine, uz mogućnost ponovnog izbora iste osobe za najviše još jedan mandat.

Ukoliko u prvom krugu glasanja niko od kandidata ne dobije dovoljan broj glasova, izbor se ponavlja sa dva kandidata koji su dobili najveći broj glasova.

U drugom krugu izabran je onaj kandidat koji ima većinu glasova.

Zamjenike predsjednika Komore bira Skupština na isti način kao u prethodnom stavu.

Zamjenike predsjednika Komore imenuje Skupština na prijedlog predsjednika Komore.

Član 33.

Predsjednika Komore u slučaju njegove spriječenosti ili odsutnosti i prema njegovom ovlaštenju mijenjaju zamjenici predsjednika Komore, sa svim pravima i ovlaštenjima predsjednika Komore.

Predsjednik i zamjenici predsjednika mogu obavljati svoje poslove prema ugovoru o radu s punim radnim vremenom ili dijelom radnog vremena ili uz određenu naknadu definisanu Odlukom Izvršnog odbora.

Član 34.

Predsjednik Komore za svoj rad odgovara Izvršnom odboru i Skupštini.

Nadzorni odbor

Član 35.

Kontrolu nad radom Komore vrši Nadzorni odbor.

Nadležnosti Nadzornog odbora su:

- donosi Poslovnik o radu Nadzornog odbora,
- analizira izvještaje o radu Komore,
- vrši kontrolu materijalno-finansijskog poslovanja i korištenja sredstava Komore i zakonitost akata Komore,
- izvještava Skupštinu o rezultatima nadzora po potrebi, a najmanje jednom godišnje za prethodnu godinu,
- obavlja i druge poslove koje mu povjeri Skupština.

Nadzorni odbor za svoj rad odgovara Skupštini.

Član 36.

Nadzorni odbor čini po jedan predstavnik svake članice Komore.

Predsjednika i zamjenike predsjednika Nadzornog odbora biraju članovi Nadzornog odbora na prvoj konstituirajućoj sjednici.

Predsjednik zakazuje sjednice Nadzornog odbora.

Mandat članova Nadzornog odbora traje četiri godine, uz mogućnost ponovnog izbora iste osobe za člana Nadzornog odbora za najviše još jedan mandat.

Član 37.

Svaka članica Komore dužna je iz reda svog članstva delegirati jednog predstavnika za člana Nadzornog odbora.

Za člana Nadzornog odbora ne može biti delegiran delegat Skupštine niti član Izvršnog odbora.

Skupština bira Nadzorni odbor.

Nadzorni odbor iz reda imenovanih članova bira predsjednika i zamjenika predsjednika Nadzornog odbora.

Član 38.

Članu Nadzornog odbora mandat prestaje:

- istekom mandata, ako ne bude ponovo imenovan na istu funkciju,
- podnošenjem ostavke,
- prestankom članstva u kantonalnoj ljekarskoj komori iz koja je delegiran,
- opozivom od strane kantonalne ljekarske komori ispred koje je delegiran,
- ako tri puta neopravdano ne prisustvuje sjednici Nadzornog odbora,
- ako ne izvršava uredno, savjesno i zakonito povjerene dužnosti i odgovornosti ili na drugi način ugrožava ugled i ciljeve komore,
- i u drugim slučajevima propisanim zakonom i ovom statutom.

Razrješenje člana Nadzornog odbora, iz razloga navedenih u stavu 1. ovog člana vrši Skupština, na način i u postupku, kako je i izabran.

Član 39.

U slučaju prijevremenog razrješenja člana Nadzornog odbora, članica iz čijeg reda je razrješeni član dužna je delegirati novog predstavnika u Nadzorni odbor.

Skupština imenuje novog člana za preostali period do isteka mandata Nadzornog odbora u čiji sastav je imenovan.

Član Nadzornog odbora koji podnese ostavku dužan je obavljati svoju dužnosti do donošenja odluke o razrješenju.

Član 40.

Nadzorni odbor radi i odlučuje na sjednicama koje se održavaju prema potrebi, a najmanje jednom godišnje, u pravilu prije podnošenja izvještaja o radu Izvršnog odbora na usvajanje Skupštini.

Član 41.

Nadzorni odbor punovažno odlučuje ako sjednici prisustvuje predsjednik i većina članova Nadzornog odbora.

Nadzorni odbor donosi odluke većinom glasova prisutnih članova.

Član 42.

Nadzorni odbor ima pravo zahtijevati sve podatke o poslovanju Komore, te izvršiti uvid u poslovne knjige i drugu dokumentaciju Komore.

Izvršni odbor dužan je omogućiti uvid u zatraženu dokumentaciju i podatke i dati tražene obavještenja i pojašnjenja.

Član 43.

Bliže odredbe o načinu rada, glasanju, odlučivanju, sazivanju sjednice, vođenju zapisnika i drugim pitanjima od značaja za rad Nadzornog odbora regulišu se Poslovnikom o radu Nadzornog odbora.

Zapisnici

Član 44.

Na sastancima organa Komore i njegovih Komisija obavezno se sačinjavaju zapisnici. Zapisnici moraju biti istiniti i moraju tačno održavati bitan tok rada i suštinu svih donijetih odluka i stavova i moraju biti potpisani od strane predsjednika organa, odnosno komisije i zapisničara.

Komisije

Član 45.

U svrhu ostvarivanja statutarnih ciljeva i provođenja djelatnosti Komore, a u skladu sa utvrđenim potrebama ili zajedničkim interesom članica, Izvršni odbor svojom odlukom može formirati stalne ili privremene komisije.

Odlukom o formiranju komisija utvrđuje se sastav i djelokrug rada komisija, kao i vrijeme (mandat) na koje se imenuje komisija.

Komisije komore su:

- Komisija za medicinsku etiku i deontologiju
- Komisija za koordinaciju edukacije
- Komisija za registar
- Komisija za međunarodnu saradnju
- Komisija za privatnu praksu
- Komisija za lijekove
- Komisija za postupak verifikacije i certifikacije zdravstvenih ustanova i zdravstvenih radnika

Član 46.

Komisija za medicinsku etiku i deontologiju obavlja slijedeće poslove:

- oblikuje Kodeks medicinske etike i deontologije;
- prati i nadzire provođenja pravila medicinske etike i deontologije, te poduzima odgovarajuće mjere u slučaju njihova kršenja;
- pruža zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža;
- koordinira odnose medju članovima, te aktivno sudjeluje u rješavanju nastalih sporova;
- raspravlja i daje mišljenja odnosno tumačenja o pojedinim pitanjima iz medicinske etike i deontologije;
- svoj rad koordinira sa ostalim organima Komore;
- obavlja i druge poslove odredjene Statutom ili aktima Komore.

Član 47.

Komisija za koordinaciju edukacije obavlja slijedeće poslove:

- organizuje u saradnji sa medicinskim fakultetima, te stručno-medicinskim društvima dodatno usavršavanje za proširenje djelatnosti unutar struke, uzimajući u obzir nove dijagnostičko-terapijske metode, te trajno obrazovanje svojih članova;
- prati način obavljanja pripravničkog i specijalističkog staža liječnika, kao i njihovo permanentno stručno usavršavanje, te predlaže mjere za njihovo unapređenje;

- propisuje uvjete stručnog usavršavanja liječnika i koordinira stručno usavršavanje članova Komore / sudjelovanje na kursevima za obnavljanje znanja, sudjelovanje na stručnim i naučnim sastancima, kongresima i simpozijima, objavljivanje stručnih i naučnih radova i sl.
- predlaže način obavljanja stručnih ispita liječnika;
- koordinira svoj rad s ostalim organima Komore;
- obavlja i druge poslove odredjene Statutom ili aktima Komore.

Član 48.

Komisija za register obavlja sljedeće poslove:

- vodi brigu i nadzor o obimu i kvalitetu stručnog djelovanja;
- te o drugim stručnim pitanjima u skladu sa Zakonom o zdravstvenoj zaštiti;
- obavlja i druge poslove odredjene Statutom ili aktima Komore.

U okviru ovog odbora mogu se formirati pododbori čiji će se obim i vrste poslova i zadataka bliže urediti Poslovnikom o radu odbora Komore.

Član 49.

Komisija za međunarodnu saradnju obavlja sljedeće poslove:

- kontinuirano radi na uspostavljanju međunarodne saradnje sa ljekarskim/liječničkim komorama drugih država, istovjetnim i/ili sličnim udruženjima, centrima za kontrolu bolesti (CDC, ECDC i dr.), sa pojedinačnim eminentnim stručnjacima iz oblasti medicine, medicinskim časopisima, raznim zdravstvenim asocijacijama, zdravstvenim strukovnim udruženjima, organima uprave i inspekcije, organima zakonodavne i izvršne vlasti, nevladinim organizacijama, farmaceutskim tvrtkama, proizvođačima medicinske opreme i sa drugim pravnim osobama kao potencijalnim donatorima Komori;
- vođenje registra u elektroničkom i pisanim obliku o uspostavljenim kontaktima Komore na međunarodnoj razini;
- učešće predstavnika Komore na međunarodnim skupovima u domenu rada Komore;
- uspostavljanje međunarodne saradnje sa ciljem omogućavanja članovima Komore edukacije u inozemstvu kroz stimulaciju i/ili donaciju Komori;
- uspostavljanje međunarodne saradnje sa ciljem mogućnosti aplikacije radova članova Komore u međunarodnim medicinskim časopisima;
- uspostavljanje međunarodne saradnje sa ciljem privremene razmjene stručnjaka iz različitih oblasti medicine;
- uspostavljanje međunarodne saradnje sa ciljem pomoći stručnjaka iz BiH iz različitih oblasti medicine liječničkim/ljekarskim komorama i zdravstvenim ustanovama drugih država kako u redovitim tako i u izvanrednim stanjima u tim državama;
- uspostavljanje međunarodne saradnje sa ciljem usvajanja i implementacije zakonske regulative iz oblasti međunarodnih zdravstvenih propisa (IHR-International Health Regulations).

Član 50.

Komisija za privatnu praksu obavlja sljedeće poslove:

- daje stručnu pomoć privatnim zdravstvenim radnicima u svim pitanjima koja su od značaja za obavljanje privatne prakse;
- daje stručnu pomoć prilikom izrade pravilnika o formiranju cijena zdravstvenih usluga, utvrđuje zajedničke smjernice i normative koji su odlučujući za formiranje cijena zdravstvenih usluga u privatnoj praksi;

- zastupa interese svojih članova, koji obavljaju privatnu praksu, kod državnih organa i drugih institucija;
- obavlja i druge poslove određene Statutom i drugim aktima Komore.

Član 51.

Komisija za lijekove obavlja sljedeće poslove:

- promovira individualni i institucionalni integritet ljekarske profesije u farmakoterapijskom sektoru;
- predlaže i usklađuje domaće zakonske propise iz oblasti lijekova sa propisima Evropske unije i rezolucijama, smjernicama, deklaracijama i stavovima relevantnih međunarodnih institucija/organizacija;
- striktno i dosljedno prati, provodi i unapređuje visoke profesionalne standarde, dosljedno sprovodi važeće međunarodne etičke norme, deklaracije i izjave iz domena rada Komisije, isključivo na dobrobit pacijenta i časne ljekarske/lječničke profesije;
- razmatra, predlaže i daje mišljenje Federalnom ministru zdravstva o listi lijekova i terapijskim smjernicama na osnovu medicine zasnovane na dokazima, te u skladu sa savremenim smjernicama relevantnih domaćih, međunarodnih i evropskih strukovnih udruženja, a uvijek imajući u vidu farmakoterapijsku i farmakoekonomsku opravdanost i dobrobit za pacijenta
- predlaže, razmatra, sugeriše i daje mišljenje Federalnom ministru zdravstva o izmjenama i dopunama liste lijekova;
- razmatra izvještaje zavoda zdravstvenog osiguranja o potrošnji lijekova i predlaže odgovarajuće mjere; prati potrošnju lijekova i medicinskih sredstava i predlaže mjere za racionalnu upotrebu;
- usko sarađuje sa svim relevantnim subjektima, a posebno Agencijom za lijekove i medicinska sredstva BiH, ministarstvima zdravstva (Federalnim i Kantonalnim/Županijskim), zavodima zdravstvenog osiguranja, (Federalnim i Kantonalnim/Županijskim), te drugim vladinim organizacijama i ustanovama, kao i drugim strukovnim udruženjima, komorama i komisijama u zajedničkom ostvarenju zacrtanih ciljeva Komisije;
- daje stručna mišljenja kod pripreme propisa koji su od uticaja na razvoj zdravstvene struke, organizira dodatno usavršavanje za proširenje djelatnosti unutar struke, s obzirom na nove dijagnostičko-terapijske metode.

Član 52.

Komisija za postupak verifikacije i certifikacije zdravstvenih ustanova i zdravstvenih radnika, obavlja sljedeće poslove:

- daje mišljenje u postupku dodjele naziva referalni centar zdravstvenoj ili dijelu ustanove;
- daje mišljenje o opravdanosti osnivanja, proširenja ili promjene zdravstvene djelatnosti u zdravstvenoj ustanovi koja obavlja tercijarni nivo zdravstvene zaštite i za čije donošenje rješenja o ispunjenosti uslova je nadležan federalni ministar, odnosno mišljenje o opravdanosti osnivanja, proširenja ili promjene univerzitetsko-kliničke bolnice i federalnog zavoda, i to sa aspekta zaštite i očuvanja profesije doktor medicine;
- prema utvrđenom načinu i uslovima za upravljanje novim zdravstvenim tehnologijama ove Komore, certificiše zdravstvene radnike za upravljanje istim;
- obavlja i druge poslove određene Statutom i drugim aktima Komore.

VII UTVRĐIVANJE ZAJEDNIČKIH KRITERIJA ZA POSTUPAK IZDAVANJA, OBNAVLJANJA I ODUZIMANJA ODOBRENJA - LICENCI ZA SAMOSTALAN RAD LJEKARA/LIJEČNIKA

1. Izdavanje odobrenja

Član 53.

Federalna Komora utvrđuje zajedničke kriterije na osnovu kojih Komore članice izdaju, obnavljaju i oduzimaju odobrenje za samostalan rad – licence.

Odobrenje za samostalan rad – licenca je javna isprava kojom ljekar/liječnik stiče pravo da samostalno obavlja poslove i zadatke svog stučnog zvanja .

Federalna komora ljekara/liječnika će posebnim Pravilnikom o kriterijima za licenciranje (izdavanje, obnavljanje i oduzimanje licence) utvrditi zajedničke kriterije za sve članice Komore.

Član 54.

Ljekari/liječnici su obavezni da u roku od 30 dana od dana položenog stručnog ispita podnesu kantonalnoj/županijskoj Komori na čijem području nadležnosti imaju prebivalište zahtjev za izdavanje odobrenja za samostalan rad.

Uz zahtjev se prilaže: diploma medicinskog fakulteta, uvjerenje o položenom stručnom ispitu, uvjerenje o državljanstvu, lična karta i potvrda o prebivalištu.

Obnavljanje odobrenja

Član 55.

Odobrenja za rad se obnavljaju u skladu sa Pravilnikom o stručnom usavršavanju članova Kantonalne Komore, a isti su usaglašeni sa zajedničkim sadržajem stručnog usavršavanja, rokovima i postupcima provjere stručnosti, utvrđenim od strane Federalne Komore.

Oduzimanje odobrenja

Član 56.

Komora oduzima članu Komore odobrenje za samostalan rad u sljedećim slučajevima:

- ako Sud Komore odredi oduzimanje odobrenja za samostalan rad kao najstrožu kaznu zbog kršenja etičkih principa struke;
- ako član Komore obavlja poslove zdravstvene zaštite izvan punog radnog vremena suprotno odredbama Zakona o zdravstvenoj zaštiti.

Rješenje o oduzimanju odobrenja za samostalan rad ljekara/liječnika se obavezno dostavlja nadležnom kantonalnom ministarstvu zdravstva.

Dobna granica za izdavanje odobrenja

Član 56A.

Komora može izdati privremeno odobrenje za samostalan rad – licencu ljekaru/liječniku do navršene 75 godine života i u skladu sa odredbama Pravilnika o utvrđivanju zajedničkih kriterija za licenciranje članova Ljekarske/Liječničke komore F BiH i članova kantonalnih/županijskih ljekarskih/liječničkih komora.

VIII - ZAŠTITA PRAVA ČLANOVA

Član 57.

Sve odluke, odnosno rješenja o ostvarivanju prava, obaveza i odgovornosti članova obavezno se u pismenom obliku dostavljaju članovima s poukom o pravnom lijeku.

Član 58.

Protiv odluka organa Komore i rješenja predsjednika Komore, izuzev odluka Suda Komore, član Komore ima pravo žalbe Sudu Komore, u roku od 15 dana od dana uručenja odluke odnosno rješenja.

Podnošenje žalbe zadržava od izvršenja odluke odnosno rješenja do konačne odluke Suda Komore, izuzev žalbe na rješenje o odizimanju odobrenja za samostala rad koja ne zadržava izvršenje rješenja.

Protiv svih odluka organa Komore, član ima pravo izjaviti prigovor Skupštini Komore čija je odluka konačna.

Odluke po žalbi imaju se donijeti u roku od 30 dana od dana podnošenja žalbe.

Sud Komore

Član 59.

Sud Komore je nezavisni organ Komore koji odlučuje o povredama dužnosti i ugleda ljekarskog/liječničkog zvanja u skladu sa Kodeksom medicinske etike i deontologije, Pravilnikom o disciplinskoj odgovornosti ljekara/liječnika, ovim Statutom te akata donešenih na osnovu Statuta.

Sud Ljekarske/Liječničke komore F BiH radi kao drugostepeni/drugostupanjski sud u postupajućim predmetima nakon presuda/odлуka kantonalnih komora.

Sud ima predsjednike i po šest /6/ članova, koje imenuje i razrješava Skupština na prijedlog Izvršnog odbora.

Odluka Suda je konačna.

Sud radi u skladu sa Pravilnikom o disciplinskoj odgovornosti ljekara/liječnika kojeg donosi Skupština.

Tužilac Komore

Član 60.

Tužilac Komore je nezavisni organ Komore koji po službenoj dužnosti i zahtjevu predlaže pokretanje postupka protiv članova Komore zbog povrede dužnosti i ugleda ljekarskog/liječničkog zvanja, u skladu sa Kodeksom medicinske etike i deontologije, Pravilnikom o disciplinskoj odgovornosti ljekara/liječnika, ovog Statuta te akata donešenih na osnovu Statuta.

Tužilac Komore ima dva zamjenika.

Tužitelja Komore i njegove zamjenike bira i razrješava Skupština, na prijedlog Izvršnog odbora.

Tužilac Komore radi u skladu sa Pravilnikom o disciplinskoj odgovornosti ljekara/liječnika.

IX OBLIK I SADRŽAJ PEČATA I ZNAKA

Član 61.

Komora ima pečat okruglog oblika, promjera 40 mm, koji uz rub u gornjem polukrugu sadrži latiničnim pismom upisan naziv Komora i to: Ljekarska komora Federacije Bosne i Hercegovine, te u donjem polukrugu upisan naziv na engleskom jeziku i to: Medical Chambers of Federation of Bosnia and Herzegovina, a u sredini je upisan skraćeni nazivi: LJKFBiH.

Štambilj je pravougaonog oblika dimenzija 40x30 mm i sadrži puni naziv komore na bosanskom/hrvatskom jeziku, oznaku za djelovodni broj i oznaku za datum.

Izvršni odbor svojom odlukom određuje broj pečata i štambilja, te osobe koje su ovlaštene za njihovo korištenje i čuvanje.

Član 62.

Komora može imati svoj znak (logo), a njegov izgled i način upotrebe utvrđuje se odlukom Izvršnog odbora.

X SREDSTVA KOMORE

Član 63.

Sredstva komore čine:

- članarina kantonalnih komora;
- dobrovoljni prilozi i pokloni od fizičkih i pravnih lica i drugi vidovi podrške;
- naplaćivanja usluga Federalne komore koje definiše Izvršni odbor;
- sredstva iz budžeta Federacije BiH (član 221. Zakona o zdravstvenoj zaštiti F BiH);
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- prodaje prava publikacija i drugih intelektualnih usluga koji su u ingerenciji Komore;
- drugi prihodi stečeni u skladu sa Zakonom i Statutom.

Član 64.

Odlukom Skupštine, u okviru godišnjeg finansijskog plana Komore, utvrđuju se visina članarine u fiksnom iznosu u zavisnosti od broja registrovanih članova svake pojedine članice, te način i rok uplate.

Kantonalne/županijske komore (članice) koje nisu izmirile sve svoje finansijske obaveze (članarine) prema Federalnoj komori ne mogu slati svoje delegate u Skupštinu Federalne komore, niti učestvovati u radu iste dok ne izmire te svoje obaveze (u skladu sa brojem svog članstva).

XI NAČIN DONOŠENJA FINANSIJSKOG I IZVJEŠTAJA O RADU

Član 65.

Skupština, na prijedlog Izvršnog odbora, na početku svake poslovne godine donosi godišnji plan rada i finansijski plan Komore sa planom prihoda i rashoda po vrstama.

Skupština, na prijedlog Izvršnog odbora, po završetku poslovne godine usvaja Izvještaj o radu i Izvještaj o finansijskom poslovanju za proteklu godinu, te donosi udluke o rasporedu dobiti ili pokrivanju gubitka.

Član 66.

Komora je dužna voditi poslovne knjige u skladu sa odgovarajućim računovodstvenim standardima i sačinjavati finansijske izvještaje, saglasno važećim propisima.

Pravilnikom o finansijskom poslovanju, kojeg donosi **Skupština Komore**, bliže se uređuje način i uslovi finansijskog poslovanja komore.

Član 67.

Predsjednik i članovi Izvršnog odbora dužni su osigurati da se sve finansijske transakcije komore zaključuju i izvršavaju po pravičnim tržišnim vrijednostima, odnosno pod uvjetima najpovoljnijim za komoru, te da upravljaju imovinom komore sa pažnjom dobrog domaćina, odnosno sa pažnjom dobrog privrednika.

Bez prethodne saglasnosti Izvršnog odbora predsjednik komore niti član Izvršnog odbora ne može odlučivati, niti postupati u ime i za račun komore u poslovima u kojima je druga strana direktno ili indirektno on sam, član njegovog porodičnog domaćinstva ili drugi njegov srodnik do trećeg stepena.

Član 68.

Članstvo u Komori je obavezno za sve ljekare u skladu sa Zakonom o zdravstvenoj zaštiti Federacije BiH (Sl.novine 46/2010).

Član 69.

U Komori se vodi register članica i njihovih delegata i predstavnika kojima se izdaje iskaznica.

Izvršni odbor odlučuje o obliku i sadržaju registra i načinu njegova vođenja, kao i obliku i sadržaju iskaznice.

Član 70.

Svaka članica – kantonalna/županijska Komora sama snosi putne i druge troškove troškove rada svojih delegata u Skupštini, kao i rada predstavnika u organima i tijelima Federalne Komore, a koji dolaze iz te Kantonalne /županijske komore.

Federalna komora snosi troškove predsjednika (zamjenika predsjednika) Federalne komore i predsjednika (zamjenika predsjednika Skupštine Federalne komore.)

XII JAVNOST RADA

Član 71.

Rad Komore i njenih organa je javan.

Javnost rada ostvaruje se redovnim informisanjem Članica Komore i javnosti o radu Komore i njenih organa preko njenih poslanika i delegata ili objavom saopćenja u medijima.

Članice Komore imaju pravo da budu redovno i potpuno informisane o radu organa i provođenju ciljeva i aktivnosti.

Za redovno i potpuno informisanje članica odgovorni su predsjednik Skupštine, predsjednik Komore, Izvršni i Nadzorni odbor, svako u okviru svojih nadležnosti.

XIII SARADNJA

Član 72.

Radi ostvarivanja svojih statutarnih ciljeva i djelatnosti, Komora može sarađivati sa sličnim udruženjima i organizacijama u zemlji i inostranstvu, kao i međunarodnim udruženjima i organizacijama, o čemu odluku donosi Izvršni odbor.

Komora može pristupiti u članstvo domaćim, stranim ili međunarodnim udruženjima i organizacijama, koje obavljaju istu ili sličnu djelatnost, o čemu odluku donosi Skupština.

XIV IZMJENE I DOPUNE STATUTA

Član 73.

Prijedlog za izmjene i dopune Statuta može dati Izvršni odbor ili jedna trećina (1/3) ukupnog broja delegata u Skupštini.

Odluku o izmjenama i dopunama ovog Statuta donosi Skupština u skladu sa članom 15. stav 3. Statuta.

Član 74.

Odluku o prestanku rada, kao i odluku o pripajanju, razdvajanju ili transformaciji na obrazloženi prijedlog Izvršnog odbora, donosi Skupština dvotrećinskom (2/3) većinom prisutnih delegata Skupštine.

74.A

Osim ovog Statuta, kao temeljnog akta, Komora je donijela i slijedeća akta:

- Statut
- Kodeks medicinske etike i deontologije
- Pravilnik o utvrđivanju zajedničkih kriterija za licenciranje članova LJ/LKFBiH i članova kantonalnih/županijskih ljekarskih/lječničkih komora
- Pravilnik o sadržaju i izgledu registra licenciranih članova LJ/LKFBiH i članova kantonalnih/županijskih ljekarskih/lječničkih komora
- Pravilnik o zajedničkim kriterijima i postupcima stručnog usavršavanja ljekara/lječnika u F BiH

- Poslovnik o radu Izvršnog odbora Ljekarske/Liječničke komore FBiH
- Pravilnik o drugostepenom disciplinskom postupku pred Ljekarskom/Liječničkom komorom F BiH
- Pravilnik o radu komisija Ljekarske/Liječničke komore F BiH

XV RASPODJELA IMOVINE

Član 75.

Skupština donosi plan likvidacije kojim se utvrđuje raspored imovine, prava i obaveze komore, u skladu sa statutom i zakonom.

Skupština imenuje likvidatora, koji se stara o planu likvidacije i koji je ovlašten da zastupa komoru u postupku likvidacije i u podnošenju prijave prestanka rada komore pred nadležnim organima.

U postupku likvidacije iz imovine Komore izmiruju se sve zakonske i ugovorne obaveze, a eventualno preostala imovina se odlukom Skupštine se raspoređuje članicama Komore srazmjerno njihovom učešću u finansiranju rada Komore po osnovu članarina.

XVI PRELAZNE I ZAVRŠNE ODREDBE

Član 76.

Statut stupa na snagu danom donošenja na Osnivačkoj Skupštini, a primjenjivat će se od dana upisa Komore kod nadležnog Suda.

broj: 01-07/12
datum: 14.04.2012. godine
mjesto: Zenica

PREDSJEDNIK SKUPŠTINE
mr. sc. Hidajet Rahimić, dr. med. prim.

Član 77.

Izmjene i dopune Statuta usvojene na Skupštini dana 22.04.2017. godine stupaju na snagu danom donošenja od kada će se i primjenjivati.

Precišćen tekst Statuta objavljen je na web stranici komore www.fmcbih.ba.

broj: 01-45/17
 datum: 22.04.2017. godine
 mjesto: Zenica

PREDSJEDNIK SKUPŠTINE
mr.sc. Hidajet Rahimić, dr.med.prim.

Član 78.

Izmjene i dopune Statuta usvojene na Skupštini dana 27.04.2019. godine stupaju na snagu danom donošenja od kada će se i primjenjivati.

Prečišćen tekst Statuta objavljen je na web stranici Komore www.fmcbih.ba.

Broj: 01-51/19
 Datum: 27.04.2019. godine
 Mjesto: Zenica

PREDSJEDNIK SKUPŠTINE
Mr.sc. Hidajet Rahimić, dr.med.prim.

Član 79.

Izmjene Statuta usvojene na Izbornoj Skupštini dana 10.10.2020. godine stupaju na snagu danom donošenja od kada će se i primjenjivati.

Prečišćen tekst Statuta objavljen je na web stranici Komore www.fmcbih.ba.

Broj: 01-96/20
 Datum: 12.10.2020. godine
 Mjesto: Zenica

PREDSJEDNIK SKUPŠTINE
Dr. Amer Iglica

Član 80.

Izmjene Statuta usvojene na Skupštini dana 16.10.2021. godine stupaju na snagu danom donošenja od kada će se i primjenjivati.

Prečišćen tekst Statuta objavljen je na web stranici Komore www.fmcbih.ba.

Broj: 01-276/21
SKUPŠTINE
 Datum: 16.10.2021. godine
 Mjesto: Tuzla

PREDSJEDNIK
Dr. Amer Iglica

SADRŽAJ:**I OPŠTE ODREDBE****II NAZIV I SJEDIŠTE****III CILJEVI****IV NADLEŽNOSTI KOMORE****V ZASTUPANJE I PREDSTAVLJANJE****VI ORGANI KOMORE****Skupština****Izvršni odbor****Predsjednik i zamjenici predsjednika komore****Nadzorni odbor****Zapisnici****Komisije****VII UTVRĐIVANJE ZAJEDNIČKIH KRITERIJA ZA POSTUPAK IZDAVANJA,
OBNAVLJANJA I ODUZIMANJA ODOBRENJA - LICENCI ZA SAMOSTALAN
RAD LJEKARA/LIJEČNIKA****VIII - ZAŠTITA PRAVA ČLANOVA****IX OBLIK I SADRŽAJ PEČATA I ZNAKA****X SREDSTVA KOMORE****XI NAČIN DONOŠENJA FINANSIJSKOG I IZVJEŠTAJA O RADU****XII JAVNOST RADA****XIII SARADNJA****XIV IZMJENE I DOPUNE STATUTA****XV RASPODJELA IMOVINE****XVI PRELAZNE I ZAVRŠNE ODREDBE**